

## Gradnja džamije u blizini nekadašnjeg Svjetskog trgovačkog centra



Plan izgradnje džamije i islamskog kulturnog centra u blizini mjesta gdje su 11. septembra 2001. godine u Njujorku izvršeni teroristički napadi izazvao je buru protesta.

Prema planu, džamija bi trebalo da bude sagrađena na oko 200 metara od mjesta gdje su se nekad nalazile kule bliznakinje Svjetskog trgovinskog centra koje su srušene u terorističkom napadu kada je poginulo oko 3.000 ljudi.

Imam Fejsal Abdul Rauf, koji vodi muslimansku organizaciju, koja stoji iza ovog plana, zalaže se za ovaj centar koji će biti u srcu Menhetna i istakao da bi zahvaljujući ovom projektu trebalo da bude promijenjen način na koji Amerikanci gladaju na muslimane.

On je rekao da će osim džamije, u sklopu centra biti i sportska sala, pozorište, pa čak možda i jaslice, a da bi projekat trebalo da košta od 105 i 140 miliona dolara.

- Ne postoji ništa slično u SAD. Biće to centar za sve građane, ne samo za muslimane, izjavio je Rauf.

Na sajtu protivnika ovog projekta objavljeno je da se skandal nastavlja, a imam Rauf optužen je da želi da nametne izgradnju džamije na mjestu pogibije brojnih Amerikanaca, žrtava terorističkog napada.

Skot Rahelson /59/ koji radi sa ljudima koji traže naknadu za štetu u vezi sa terorističkim napadima izjavio je da je loš izbor da se na tom mjestu izgradi džamija.

- Ne znam zašto baš mora biti na tom mjestu. Grad je dovoljno veliki, izjavila je Dženifer Vud /36/, koja živi u zgradi pored mjesta odabranog za ovaj projekat.

Ona je dodala da ideja da se na tom mjestu sagrađi džamija kod nje izaziva gnjev.

- Mislim da je to nedopustivo. To je sveta zemlja i ovo je šamar u lice. Ne znam kako je neko mogao dati dozvolu za to, rekla je Rozmari Kejn, majka vatrogasca koji je poginuo 11. septembra, piše "Dejli mejl".

Bil Dojl, čiji je sin poginuo u napadu, plaši se da bi džamija mogla postati mjesto okupljanja radikala, dok Pol Sipos, član gradske uprave, smatra da bi centar trebao biti smješten negdje drugdje.

- Da su Japanci odlučili da otvore kulturni centar u blizini Perl Harbura, to bi bilo osjetljivo pitanje. Isti slučaj bio bi i kada bi Nijemci odlučili da otvore kulturni centar u blizini Aušvica, čak i nakon svih ovih godina. Nemam apsolutno ništa protiv islama, ali se pitam, zašto ovdje?, ističe Sipos.

Izvršna direktorica organizacije "Stop islamizaciji Amerike" Pamela Geler, narednog mjeseca organizuje proteste protiv izgradnje kulturnog centra.

"Šta može biti uvrijedljivije i više ponižavajuće od ogromne džamije u sjeni Svjetskog trgovinskog centra. Svaki čestiti Amerikanac, musliman ili neki drugi, ne bi sanjao o takvoj uvredi", rekla je Gelerova.

Poslije 11. septembra, mjesto napada zvano "nulta tačka", postalo je odredište koje svake godine posjete milioni građana da bi odali počast žrtvama.

- U svijetu postoji oko milijardu muslimana. Nisu svi oni teroristi, izjavio je Mohamed-Ikbal Husein Čauduri, imigrant iz Bangladeša koji drži kiosk za novine s druge strane ulice.